

RADIO KELKBOOM TA STOP DI TRANSMITI

Diadomingo 16 di juni: ultimo dia di transmision

Faltando un paar di dia pa Radio Kelkboom pertenece na pasado, lo tin e siguiente programanan special:

Diadomingo awo dia 9, e penultimo diadomingo di existencia di Radio Kelkboom, Produccion Tromp y Butishi di Alegria ta transmiti e programa **FESTIVALNAN DI RANCHERA** cu Eddy cu Ito a transmiti hopi aña pasa.

E programa ta cuminsa 2 or di merdia y tin duracion di 4 ora.

Y pa dia 16 di juni, e ultimo dia di existencia di e prome emisora comercial di Aruba, Butishi di Alegria tin un programa special cu ta cuminsa 12 or di merdia y ta bay te den oranan di anochi.

Produccion Tromp lo transmiti BIBO for di studionan di Radio Kelkboom. Lo tin hopi musica di nos artistanan Arubiano y Antiyano, manera semper tabata e custumber di Butishi di Alegria.

For di awo caba ta pidi tur hende pa sintonisa Radio Kelkboom den su ultimo dianan di existencia, specialmente diadomingo awo y tambe dia 16, riba banda FM, frecuencia 106.7.

Pa loke ta trata e programa di diadomingo cu a pasa, Radio Kelkboom a haya masha bon comentario y hopi reaccion, specialmente ora cu a scucha e cantantenan cu nan bunita temanan.

Ta lamentabel cu Radio Kelkboom mester cera, pero asina bida ta. Awe nos t'ey y nos no sa si mañan nos t'ey ainda. En todo caso, nos ta conta cu bo sintonia.

Danki di antemano na tur, sin excepcion, cu di un forma of otro a haci di Radio Kelkboom e emisora unico di Aruba y di region di Caribe.